

आकाशवाणी

खास-खास खबरां:-

1. संसद नै बपार कारोबार गी होर सखल्ला बनाने लेई टैक्सेशन ते होरनें कनूनें सरबंधि तरमीमी बिल पास करी दिता ऐ- खजाना मंत्री निर्मला सीतारमण होरें आखेआ जे उपभोक्ताएं लेई डिजिटल भुगतान पैहले आंगर मुफ्त रौहग।
2. भारत सरकार नै e-Visa धारक विदेशी नागरिकें दा भारत च प्रवेश सौखा बनाने लेई 11 होर अंतराष्ट्रीय बंदरगाहें दी अधिसूचत कीती ऐ।
3. झारखंड च छात्र आंदोलन नेता देवेन्द्र मोहतो-हालत नाजुक होने पर अस्पताल भर्ती- BJP ने छात्रों पर पुलिस कारवाई खलाफ अज्ज झारखंड बंद दा आह्वान कीते दा ऐ।
4. कोलम्बिया च आए दे 7 इशारिया 4 तीव्रता आहले भूचाल च मरने आहलें दी गिनतरी 132- 570 कोला मते घायल।
5. ते मौसम विभाग ने अगले दंऊ दिनें लेई गुजरात- हिमचाल प्रदेश- उत्तराखंड ते पच्छमी उत्तर प्रदेश च भारी बरखा दा अलर्ट जारी कीता ऐ।

<><><><><><>

Tax Bill

संसद नै टैक्स लाने ते होरनें कनूनें सरबंधि तरमीमी बिल-2026 गी पास करी दिता ऐ जेहदे नै बपार कारोबार होर सखल्ला ते सुवधाजनक होग। केन्द्री खजाना मंत्री निर्मला सीतारमण होरें आखेआ ऐ कि इस बिल कन्नें UPI पर कोई सिद्धा टैक्स नैई लाया

जाहग ते आम उपभोक्ताएं लेई डिजिटल भुगतान पैहले आंगर पूरी चाल्ली मुफ्त होग। इस बिल दी मदद कन्नै देश दे उत्पादन ते निर्माण क्षेत्र गी बढ़ावा थहोग ते विदेशी निवेशक बी आकर्शित होग। इस कन्नू कन्नै भारत च डेटा सेंटर सेवाएं दे विस्तार लेई विदेशी कम्पनिएं गी बी टैक्स च छूट थहोग ते मती मतियां कम्पनियां इत्थे रासपूंजी लाने लेई तयार होगन।

<><><><><><>

Gem Portal

उद्योग ते बपार मंत्री पीयूष गोयल होरें आखेआ ऐ जे सरकारी e-मार्केटप्लेस-जैम पोर्टल उचित गुणवत्ता- सेई मुल्ल ते सेई समें पर सेई उत्पाद दी खरीद गी दर्शादा ऐ। गोयल होरें कल नमीं दिल्ली च जैम पोर्टल दे 10में स्थापना दिवस पर एह गल्ल आखी। उ'नें आखेआ जे जैम दे औने थमां पैहले सरकारी पैसे दा गलत इस्तेमाल होआ रदा हा- खरीद च पारदर्शिता नैई ही ते खरे सुशासन दी कमी ही। गोयल होरें आखेआ जे जैम पोर्टल दे राएं 3 करोड़ थमां मते ऑर्डस कन्नै 20 लक्ख करोड़ रपे थमां मते दे समान ते सेवाएं दी खरीद च सहायता थहोई ऐ। उ'नें आखेआ जे 42 जहार थमां मते स्टार्ट-अप नै सरकारी उद्यमें कन्नै लगभग 66 जहार करोड़ रपे दा कारोबार कीता। गोयल होरें दस्सेआ जे जैम पोर्टल गी नमां स्वरूप दिता जा'रदा ऐ। केन्द्रीय मंत्री होरें खरीददारें ते विक्रेताएं दी सहायता आस्तै इक विशेष देश-व्यापी 5 अंक आहला शॉर्ट कोड 1-4-5-5-0 जारी कीता।

<><><><><><>

E-Visa

सरकार नै e-Visa धारक विदेशी नागरिकें दा भारत च प्रवेश सौखा बनाने आस्तै 11 होर अंतराष्ट्रीय बंदरगाहें दी अधिसूचना जारी कीती ऐ। गृह मंत्रालय नै दस्सेआ जे इंदे च 9 स्थल सीमा बंदरगाह ते 2 हवाई अड्डे शामिल न। इंदे च भोपाल ते तिरुपति दे हवाई अड्डे ते अटारी ते अगरतला दे स्थल सीमा बंदरगाह शामिल न। मंत्रालय नै आखेआ जे इ'ने बंदरगाहें दे जुड़ने कन्ने इलेक्ट्रानिक वीज़ा होर बी उपयोगी होई गेआ ऐ। मंत्रालय नै आखेआ जे भारत लगभग 95 फीसद e-Visa आवेदनं गी 72 घंटे थमां बी घट्ट समें च मंजूरी दिंदा ऐ।

<><><><><><>

Jharkhand Protest

झारखंड च JPSC ते JSS परीक्षाएं च कथित अनियमितताएं गी लेइयै छात्रों दा आंदोलन कल करीब 10 घंटे तगर जारी रेआ। भारतीय जनता पार्टी नै विधानसभा घेराव दौरान प्रदर्शनकारी छात्रों पर पुलिस दी कारवाई पर अज्ज झारखंड बंद दा आह्वान कीते दा ऐ। विधानसभा दा घेराव करीबन 10 घंटे तगर जारी रेआ ते प्रदर्शनकारियें Gate No -1 तगर पुजने दी कोशिश कीती। पुलिस नै उन्दे पर पानी दी बौछार, अत्थरु गैस ते लाठी-चार्ज कीता। छात्र आंदोलन दे नेता देवेन्दर नाथ मोहतो पिच्छले 9 दिनें थमां भुक्ख हड़ताल पर न। कल उन्दी तबीयत खराब होई गई, जेदे मगर उनें'गी अस्पताल भर्ती करोआया गेआ। डाक्टरें आस्सेआ उंदी निगरानी कीती जा'रदी ऐ ते उनें'गी ऑक्सीजन Support पर रखेआ गेदा ऐ।

<><><><><><>

Colombia Earthquake

पच्छमी कोलम्बिया च कल आए दे 7 इशारिया 4 तीव्रता आहले भूचाल च मरोने आहलें दी गिनत्री 132 तगर पुज्जी गई ऐ जिसलै जे 570 कोला मते घायल होई गेदे न। अमरीका दे जिमी हेठ सर्वेक्षण सरबन्धि मैहकमे दे मुजब भूचाल दा केन्द्र राजधानी बोगोटा कोला कोई 400 किलोमीटर पच्छम च चोको क्षेत्र दे सैन होस डेल पालमार दस्सेआ गेआ ऐ। इस भूचाल करी सैकड़ा इमारतां ढेई पेड़या ते कैई लोक अजें बी मलबे हेठ दबोए ऐन। कोलम्बिया दे राष्ट्रपति एबेलार्डो डे ला एस्पिरएला होरें राहत ते बचा कम्मैं च तेजी आहन्ने लेई उत्थै इमरजेंसी घोषत करी दिती ऐ। उ'नें आखेआ जे भूचाल दे कारण 20 कोला मतिएं नगर-पालिकाएं पर असर पेआ ऐ ते सारे शा मता नुकसान पेरेरा, कैली, क्विबडो ते मनिज़ालेस शैहरें च होआ ऐ। तोंआई गोआंडी मुख्यें इक्वाडोर ते पनामा च बी भूचाल दे झटके मसूस कीते गे, पर उत्थे कुसै बड्डे नुकसान दी फिलहाल कोई खबर नैई ऐ। पिच्छले इक दहाके च कोलम्बिया च आए दा एह सब्बने शा जबरदस्त भूचाल ऐ।



Rijiju-Protest Discussion

संसदी मामलें दे मंत्री किरें रिजिजू होरें आखेआ ऐ जे सरकार विद्यार्थिएं दे बरोध-प्रदर्शन ते एहदे नै जुड़े दे मुद्दे पर संसद च तफसीली चर्चा करने लेई तैयार ऐ। कल संसद भवन परिसर च पत्रकारें कन्नै गल्ल करदे होई किरें रिजिजू होरें आखेआ कि छात्र आंदोलन पर पूरी तफसील च चर्चा दिल्ली च ते मुख्य भरै च विद्यार्थिएं कन्नै सरबन्धत जेहड़े बी आंदोलन चलै करदे न, उंदे पर संसद च चर्चा कीती जाई सकदी ऐ।

उनें कांग्रेस पार्टी ते होरनें बरोध धईं गी अपील कीती जे हून जिसलै सरकार इस मुद्दे पर चर्चा लेई तैयार ऐ तां ओह संसद च भलेयां कोई डंड रौली नेई पान ते जेकर ओह इयां करदे न तां संसद दी कार्रवाई रमानदारी आहले ढंगै सिर चली सकग ते इस मुद्दे पर बी चर्चा पूरी होई सकग। एहदे शा पैहले राज्यसभा च विपक्ष दे नेता मलिकार्जुन खड़गे होरें विद्यार्थिएं खलाफ कीती गेदी कार्रवाई पर गृह मंत्री हुंदे बयान दी मंग कीती। खड़गे होरें आखेआ कि ओह पिछले 17एं दिनें थमां एह कोशश करा करने आं जे ओह सदन च आइयै इक बयान देन। उनें आखेआ कि चर्चा करना विपक्ष बी चाहंदा ऐ पर अस्स गृह मंत्री हुंदे मुंहा उंदा केह आखना ऐ, इस बारै एह सुनना चाहंने आं।

<><><><><><>

Navy Chief Mauritius Visit

नौसेना प्रमुख एडमिरल कृष्णा स्वामीनाथ अज्जे सवां मारिशस दी चार दिनें दी अधिकारिक जातरा पर न। रक्षा मंत्रालय नै आखेआ जे एह दौरा समुंद्री सहयोग गी बढ़ावा देने ते मारिशस कन्नै रक्षा सरबंधें गी मजबूत करने लेई भारत दे जत्नें दा इक हिस्सा ऐ। अपने दौरे दरान ओह मारिशस दे सीनियर ऐहलकारें कन्नै मलाटी करंगन ते समुंद्री सुरक्षा, रक्षा सहयोग, समर्थ ज्नेह आपसी हितें दे क्षेत्रें पर चर्चा करडन।

<><><><><><>

GeM

पिछले 10 बरें च सरकारी ई-मार्केट प्लेस पर बेची जाने आली चीजें ते सेवाएं दा कुल खरीद मुल्ल 422 करोड़ रुपें थमां बधिये 1 लकख 55 ज्हार करोड़ रुपें कोला मता होई

गेआ ऐ। इक सोशल मीडिया पोस्ट च केंद्री बपार ते उद्योग मंत्री पीयूष गोयल होरें आखेआ जे 12 लक्ख शा मते लौहके ते भलेयां लौहके उद्यम जिंदे चा 2 लक्ख शा मते दी अगुवाई महिलां करा'करदियां न ते 42 जहार शा ते स्टार्ट अप इस पोर्टल पर पंजीकृत न।

<><><><><><>

IMD-Weather

मौसम विभाग नै अगले 24 कोला 48 घंटे दरान गुजरात, हिमाचल प्रदेश, उत्तराखंड ते पच्छिमी उत्तर प्रदेश च मौलेधार बरखा दा अलर्ट जारी कीता ऐ। हरियाणा, चंडीगढ़, पंजाब, उत्तर प्रदेश, बिहार, विदर्भ, असम ते मेघालय च बी कल्लै तगर तेज बरखा जारी रौहने दी पेशनगोई कीती गेदी ऐ। एहदे अलावा जम्मू-कश्मीर, झारखंड, कर्नाटक, केरल, माहे, पच्छिम बंगाल, छत्तीसगढ़ ते आंध्र प्रदेश च अज्ज ते कल बिजली मिलकने ते गर्ज चमक कन्नै बरखा बरने दे असार दस्से गे न।

<><><><><><>

Common Wealth Fencing

नाइजीरिया दे लागोस च राष्ट्रमंडल अंडर-23 तलवारबाजी चैम्पियनशिप दे पैहले ध्याड़े भारती खडारिएं शानदार प्रदर्शन करदे होई सुन्ने दे 7, चांदी दे 4 ते कैह दे 9 तगमें समेत कुल 17 तगमे जिती लैते न। मर्दे दी सेबर स्पर्धा च निखिल वाघ ने सुन्ने दा, लक्ष बडसेर ने चांदी दा तगमा जितेआ। अश्विनी आर्य ते लैशराम मोराम्बा नै कैह दे तगमे जिते। मर्दे दी गै फाईल स्पर्धा च तेजस पाटिल ने चांदी दा ते हेमांश सनासम ने कैह दा तगमा हासल कीता ऐ। इससै चाली ए.पी स्पर्धा च लोकेश वेमानी ने चांदी

दा ते शौर्य अश्विनी ते गॉडविन एंकबेस ने कैह दा तगमा हासल कीता। महिलाएं दे वर्ग च जॉयस अशिता ने फॉइल स्पर्धा च सुन्ने दा ते कनाग लक्ष्मी ने चांदी दा तगमा हासल कीता। ए.पी. स्पर्धा च प्राची लोहान ने सुन्ने दा ते निवेध्या नायर ते अनुप्रिया नै कैह दा पदक अपने नांs कीता-जिसले कि सेबर स्पर्धा च जेफरलिन ने सुन्ने दा-आरवी शर्मा ने चांदी दा ते श्रेया गुप्ता नै कैह दा तगमा जितेया।

<><><><><><>